

SAMOA

Faatulagaina o Aiaiga

- | | |
|---|---|
| 1. Igoa puupuu ma le amataga | 18. Pine Taualoa a Samoa |
| 2. Faamatalaina o uiga o upu | 19. Pine a le Ao o le Malo mo le Lototoa |
| 3. Faafoeina o le Tulafono | 20. Faailoga mo e ua maliliu |
| 4. Faaeeina atu o faailoga | 21. Faaugaina o “Ituaiga o Taumafaiga” |
| 5. Agavaa aoao mo faailoga | 22. Tulaga Aloaia e tuuina atu i faailoga |
| 6. Faamatalaga o faailoga | 23. Komiti o Tulaga Mamalu ma Faailoga Taualoa |
| 7. Poloaiga Tutasi a Samoa - Tulaga Faapitoa | 24. Matafaioi a le Komiti |
| 8. Poloaiga Sili a Samoa | 25. Fautuaga mo le tuuina atu o faailoga |
| 9. Poloaiga a Samoa – Tulaga Muamua | 26. Foliga o faailoga ma tau |
| 10. Poloaiga Faapaaga a Samoa – Tulaga Lua | 27. Totogi tau tupe |
| 11. Poloaiga mo Galuega Maoae ma le Tauleleia | 28. Faailoga Taualoa e le aofia ai manaoga uma ua aiaia (Honorary Awards) |
| 12. Ofisa o le Poloaiga a Samoa – Tulaga Tolu | 29. Faailoga leiloa |
| 13. Sui o le Poloaiga a Samoa - Tulaga Fa | 30. Faaleaogaina o faailoga ona o amio le taupulea |
| 14. Poloaiga a le Ao o le Malo mo le Tautua | 31. Solitulafono |
| 15. Pine a le Ao o le Malo mo le Tautua | 32. Tulafono Faatonutonu |
| 16. Koluse a Malietoa | 33. Mea ua soloia ma faasaoina |
| 17. Koluse a Samoa | |

O SE TULAFONO e soloia ai le Tulafono o Faailoga Taualoa mo Galuega Maoae ma le Tauleleia 1992/1993, Nu.3, ma faamausali ai le faiga mo le faaeeina atu o faailoga e aloaia ai galuega maoae ma le tauleleia po o gaoioiga o le lototele mo Samoa. [25 Aokuso 1999]

UA FAIA e le Fono Aoaofaitulafono o Samoa i totonu o le Palemene ua potopoto e faapea:-

1. Igoa puupuu ma le amataga—(1) E mafai ona taua lenei Tulafono o le Tulafono o Tulaga Mamalu ma Faailoga Taualoa 1999.

(2) O lenei Tulafono o le a tatau ona amata faamamaluina i le aso e tuuina i ai le maliega a le Ao o le Malo.

2. Faamatalaina o uiga o upu – I totonu o lenei Tulafono, ae vagana ai e ese se isi uiga e manaomia e le mataupu:

“Faailoga” o lona uiga o se faailoga e pei ona faamatalaina i le fuaiupu 6 o lenei Tulafono:

“Galuega mo tagata lautele” o lona uiga o galuega a Samoa i so o se aotelega ma e aofia ai vaega tumaoti ma faalelotu:

“Komiti” o lona uiga o le Komiti o Tulaga Mamalu ma Faailoga Taualoa ua faavaeina i lalo o le fuaiupu 23 o lenei Tulafono:

“Matagaluega” o lona uiga o le Matagaluega a le Palemia.

3. Faafoeina o le Tulafono – O lenei Tulafono o le a faafoeina e le Matagaluega a le Palemia ma o lena Matagaluega o le a tatau ona ia tuuina atu galuega tau pulega, faafoeina ma galuega faa-Failautusi i le Komiti Faatino.

4. Faaeeina atu o faailoga – E mafai e le Ao o le Malo i luga o le fautuaga a le Kapeneta ona faia se Poloaiiga e faaee atu ai pe tuuina atu ai ni faailoga e tusa ai ma aiaiga o lenei Tulafono.

5. Agavaa aoao mo faailoga-(1) I le noatia ma le fai fuafua i le faafuaiupu (2) o lenei fuaiupu, ma i le fuaiupu 10(1)(b) e leai se tagata o le a agavaa e mauaina se faailoga vagana ai o ia o se tagatanuu o Samoa i le taimi o le faaeeina atu o lena faailoga.

(2) Faafuaiupu (1) o lenei fuaiupu o le a le tatau ona faaaogaina i faailoga taualoa e le aofia ai manaoga uma ua aiaia (Honorary Awards) i lalo o le fuaiupu 28.

6. Faamatalaga o faailoga-(1) O faailoga o le a tatau ona faavasegaina e faapea -

- (a) Faailoga mo le tautuaina o tagata lautele;
- (b) Faailoga mo le lototele ma le lototoa.

(2) O faailoga mo le tautuaina o tagata lautele i o latou faasologa taua e faapea -

- (a) Poloaiga Tutasi a Samoa - Tulaga Faapitoa (G.O.S.);
- (b) Poloaiga Sili a Samoa;
- (c) Poloaiga a Samoa – Tulaga Muamua (O.S.);
- (d) Poloaiga Faapaaga a Samoa - Tulaga Lua (C.O.S.);
- (e) Poloaiga mo Galuega Maoae ma le Tauleleia (O.M.);
- (f) Ofisa o le Poloaiga a Samoa – Tulaga Tolu (O.S.);
- (g) Sui o le Poloaiga a Samoa – Tulaga Fa (M.S.);
- (h) Poloaiga a le Ao o le Malo mo le Tautua (H.S.S.O.);
- (i) Pine a le Ao o le Malo mo le Tautua (H.S.S.M.).

(3) O pine mo le lototoa ma le lototele i o latou faasologa taua –

- (a) Koluse a Malietoa (M.C);
- (b) Koluse a Samoa (S.C.);
- (c) Pine Taualoa a Samoa (S.M.H.);
- (d) Pine a le Ao o le Malo mo le Lototoa (H.S.M.V.).

(4) O mataitusi i faapuupuuga o faamatalaga o lo o i totonu o le faafuaiupu (2) ma le (3) o lenei fuaiupu e le avea o se vaega o igoa o faailoga peitai a fai o se faailoga e faamatalaina i se tulaga tusitusia e mafai ona faamatalaina e mataitusi talafeagai e pei ona aliali ai i totonu o ia faafuaiupu.

7. Poloaiga Tutasi a Samoa - Tulaga Faapitoa-(1) O le Poloaiga Tutasi a Samoa - Tulaga Faapitoa, o le a avea o le faailoga a le Malo mo tofiga, e faailoa ai le umia o tofiga aupito maualuga a le Malo i totonu o Samoa.

(2) I le noatia ma le fai fuafua i le faafuaiupu (3) o le a tatau i le Ao o le Malo e tusa ai ma lona tofi ma a o faagasolo pea lona umia o le tofi ona umia na o ia lava lenei faailoga ma seia oo ina tuumalo pe faamalolo litaea o ia ona faatoa tauaao atu lea i le tagata o le a sui tulaga ia te ia.

(3) E ese mai ai i aiaiga o le faafuaiupu (2), o lana Afioga Malietoa Tanumafili II, Ao o le Malo Tutoatasi o Samoa, o le a na o ia lava e tuuina atu i ai ma umia lenei Poloaiga e oo i le faavavau, e avea ai o se faaaloaloga i lana tautua matavela ma le faamaoni i le Malo ma tagata o Samoa.

8. Poloaiga Sili a Samoa-(1) O le Poloaiga Sili a Samoa, o le a avea ma faailoga maualuga mo le tautua maoae ma le tauleleia, ma o le a mafai ona faaeeina atu i tagata o i latou ia na faia ni saofaga pito i sili ona maoae i le malo ma mo tagata, olaga ma aganuu o Samoa i le tulaga faale-atunuu po o le faava-o-malo, ma ua alagata ai ona tuuina atu i ai ni tulaga mamalu ma le aloaia a tagata o Samoa.

(2) I le noatia ma le fai fuafua i le fuaiupu 28, o le a le tatau i so o se taimi ona sili atu na i lo le toalua (2) ni tagata soifua e umia le Poloaiga Sili a Samoa.

9. Poloaiga a Samoa – Tulaga Muamua-(1) O le Poloaiga a Samoa – Tulaga Muamua e mafai ona faaeeina atu i ni tagata o i latou ia na faia ni saofaga maoae i le Malo ma tagata, olaga ma le aganuu o Samoa i tulaga faale-atunuu po o le faava-o-malo.

(2) I le noatia ma le fai fuafua i le fuaiupu 28, e le tatau i so o se taimi ona sili atu na i lo le sefulu (10) ni tagata soifua e umia le Poloaiga a Samoa – Tulaga Muamua.

10. Poloaiga Faapaaga a Samoa – Tulaga Lua-(1) O le Poloaiga Faapaaga a Samoa – Tulaga Lua e mafai ona faaeeina atu i -

- (a) Ni tagata o i latou ia na faia se saofaga e matua taua lava i le Malo ma mo tagata, olaga ma le aganuu o Samoa, i tulaga faale-atunuu po o faava-o-malo; ma
- (b) Tagata ia o lo o avea pe sa avea ma faauluuluga o ni faalapotopotoga (pe i fafo po o i totonu o le atunuu), po o i latou ia o lo o avea pe sa avea ma taitai o malo i fafo po o ni faalapotopotoga, e aloaia ai le umi ma le taua o le tautua, fesoasoani ma le faiga paaga na tuuina mai ia Samoa e ia faalapotopotoga tumaoti, malo po o faalapotopotoga po o e ia taitai.

(2) I le noatia ma le fai fuafua i le fuaiupu 28, o le a le tataui so o se taimi ona sili atu na i lo le sefulu (10) ni tagata soifua e umia le Poloaiga Faapaaga a Samoa – Tulaga Lua.

11. Poloaiga mo Galuega Maoae ma le Tauleleia-(1) O le Poloaiga mo Galuega Maoae ma le Tauleleia e mafai ona faaeeina atu i -

- (a) Ni tagata sa faia ni tautua maoae mo Samoa e le gata i totonu o le atunuu ae faapea foi tulaga faava-o-malo; po o
- (b) Ni tagata sa tuuina atu ni saofaga maoae i le alualu i luma o so o se taumafaiga aemaise lava le tuuina atu o le faamamafa i luga o le poto salalau, aoaoina, tusia o tusi, faa-saienisi ma mataupu faale-lotu, i mataupu i totonu o le atunuu ma faava-o-malo ma isi tulaga e faamanuiaina ai Samoa pe i se faiga tuusao po o le faaalatua.

(2) I le noatia ma le fai fuafua i le fuaiupu 28 o le a le tataui so o se taimi ona sili atu na i lo le sefulu lima (15) tagata soifua e umia le Poloaiga mo Galuega Maoae ma le Tauleleia.

12. Ofisa o le Poloaiga a Samoa - Tulaga Tolu-(1) O le Ofisa o le Poloaiga a Samoa – Tulaga Tolu e mafai ona faaeeina atu i -

- (a) Ni tagata o i latou ia na faia ni saofaga iloga ma le tauleleia mo Samoa; ma
 - (b) Ni tagata sa matua galulue ma le filiga i so o se taumafaiga e le gata i totonu o le atunuu ma faava-o-malo ae faapena foi tulaga e faamanuiaina ai Samoa, i se faiga tuusao ma le faaalatua mo Samoa, po o e maua mai ai tulaga tauleleia mo Samoa.
- (2) I le noatia ma le fai fuafua i le fuaiupu 28, o le a le tatau i so o se taimi ona sili atu na i lo le sefululima (15) ni tagata soifua e umia le Ofisa o le Poloaiga a Samoa – Tulaga Tolu.

13. Sui o le Poloaiga a Samoa - Tulaga Fa-(1) O le Sui o le Poloaiga a Samoa e mafai ona faaeeina atu i -

- (a) Tagata o i latou ia na faia ni saofaga maoae ma le aloaia mo Samoa; po o
 - (b) Ni tagata o i latou ia na matua galulue ma le maeleelega i so o se taumafaiga i totonu o le atunuu faapea foi ma taumafaiga e faamanuia ai Samoa pe i se faiga tuusao po o le faaalatua po o ni taumafaiga e maua ai le igoa tauleleia o Samoa.
- (2) I le noatia ma le fai fuafua i le fuaiupu 28 e le tatau i so o se taimi ona sili atu na i lo le sefulu lima (15) ni tagata soifua e umia le Sui o le Poloaiga a Samoa.

14. Poloaiga a le Ao o le Malo mo le Tautua-(1) O le a lua (2) ni vaega o le Poloaiga a le Ao o le Malo mo le Tautua e faapea -

- (a) Mo Galuega tau i le Lotoifale; ma
 - (b) Mo galuega a le Malo.
- (2) O le Faailoga o le Poloaiga a le Ao o le Malo mo le Tautua mo Galuega tau i le Lotoifale e mafai ona faeina atu i ai latou ua aloaia a latou saofaga maoae ma le taua mo o latou nuu, itumalo po o alaafaga po o mo ni taunuuga maoae ua latou faia i so o se taumafaiga po o matata o lo o latou galulue ai.

(3) O le Faailoga o le Poloaiga a le Ao o le Malo mo le Tautua mo Galuega a le Malo e mafai ona faaeeina atu i ai latou ua faia ni saofaga maoae po o ua tuuina atu ni tautua matavela ma le tauleleia i le Malo o Samoa i so o ituaiga taumafaiga.

(4) I le noatia ma le fai fuafua i le fuaiupu 28, e le tatau i so o se taimi ona sili atu na i lo le lua sefulu (20) ni tagata soifua e umia le Faailoga o le Poloaiga a le Ao o le Malo mo le Tautua.

15. Pine a le Ao o le Malo mo le Tautua-(1) O le a lua (2) ni vaega o le Pine a le Ao o le Malo mo le Tautua, e faapea -
(a) Mo Galuega tau i le Lotoifale; ma
(b) Mo Galuega a le Malo.

(2) E ui lava ona o agavaa a i latou e mafai ona tuuina atu i ai le Pine a le Ao o le Malo mo le Tautua i totonu o nei vaega e lua e tali tutusa ma aiaiga e pei ona faatulagaina i le faafuiauupu (2) ma le (3) o le fuaiupu 14, o se Pine e faaeeina atu e tusa ai ma lenei fuaiupu e mafai ona tuuina ia i latou ua i le manatu o le Komiti o Tulaga Mamalu ma le Tauloa sa latou faia ni galuega aoga ma faataunuuna i so o se matata sa taumafai i ai po o i latou na tuuina atu ni tautua matavela ma le tulaga tauleleia mo Samoa.

(3) I le noatia ma le fai fuafua i le fuaiupu 28, e le tatau i so o se taimi ona sili atu na i lo le luasefulu (20) ni Pine a le Ao o le Malo mo le Tautua e tuuina atu i totonu o so o se tausaga faale-kalena.

16. Koluse a Malietoa – O le Koluse a Malietoa e mafai ona faaeeina atu mo na o gaoioiga o le matua lototoa po o se lototele e sili ona iloga i luma o ona fili po o mo se lototele ma le le fefe faatasi ai ma se gaoioiga lototoa na uluai fuafuaina po o se ositaulaga ofoina atu e le tagata lava ia e tusa ai ma tulaga ogaoga ma le matautia.

17. Koluse a Samoa – O le Koluse a Samoa e mafai ona faaeeina atu mo ni gaoioiga o le lototele e faaalua ai le matua lototoa i tulaga ogaoga ma le matautia e aunoa ma le manatunatu i ni tulaga e ono lamatia ai se itutino tau le tagata po o le faamanualia ai o nisi o itutino.

18. Pine Tauloa a Samoa – O le Pine Tauloa a Samoa e mafai ona faaeeina atu mo ni gaoioiga e matua faaalua ai le lototoa i ni tulaga e sili ona matautia e aafia ai le aveesea o se ola po o se itutino.

19. Pine a le Ao o le Malo mo le Lototoa – O le Pine a le Ao o le Malo mo le Lototoa e mafai ona faaeeina atu mo ni gaoioiga e faaalua ai le tele o le lototoa i ni tulaga ogaoga ma le matautia.

20. Faailoga mo e ua maliliu – O faailoga e pei ona faamatalaina i fuaiupu 8, 16 ma le 17 o lenei Tulafono e mafai ona faia mo e ua maliliu.

21. Faauigaina o “Ituaiga o Taumafaiga” – Mo faamoemoega o lenei Tulafono, “O Ituaiga o Taumafaiga” e aafia ai le -

- (a) Galue i totonu o galuega a Samoa;
- (b) Tautua e avea ai o se Sui Usufono o le Palemene po o e avea ai o se Minisita o le Malo;
- (c) Tautua e avea ai o se sui o se faalapotopotoga e faapitoa mo le Soifua lelei o Samoa po o Tagata o Samoa;
- (d) Tautua e avea ai o se sui o se ekalesia po o se faalapotopotoga faale-lotu;
- (e) Galue e avea ai o se tagata e galue mo ia lava;
- (f) Galue e avea ai o se tagata faigaluega;
- (g) Galue e avea ai o se tagata galue ofo fua;
- (h) Auai i so o se gaoioiga tau le aoaoina o le potomaaoe;
- (i) Auai i so o se gaoioiga tau le aoaoina;
- (j) Auai i galuega tau tusiga-ata ma le faatinoina o so o se taleni vaai;
- (k) Auai i so o se galuega taulima;
- (l) Gaoioiga e avea ai o se sui tau taaloga;
- (m) So o se isi lava gaoioiga ua faatonuina e tulafono faatonutonu e avea ai o se ituaiga o taumafaiga.

22. Tulaga Aloaia e tuuina atu i faailoga-(1) O i latou uma e umia se faailoga o le a i ai le aia e valaaulia ai e auai atu i sauniga uma faale-Malo, ma ia asoaina lana lipine faatasi ai ma le pine i so o sea sauniga ma e mafai i so o se taimi ona faaaogaina se ata moni ua faaitiitia o sea pine po o le lipine.

(2) O i latou uma e umia se faailoga e mafai, ina ua maea so o se lolomiina po o le tusiina o lona igoa, ona faaopoopo i ai ni mataitusi talafeagai e faamatalaina ai le faailoga o lo o umia e ia.

(3) O i latou o lo o umia Faailoga o le a tuuina atu i ai nisi tulaga aloaia e pei ona o le a faatonuina e tulafono faatonutonu.

(4) Mo faamoemoega o lenei fuaiupu “faailoga” e aofia ai se faailoga tauloa e le o aofia ai manaoga uma ua aiaia e lenei Tulafono (Honorary Award).

23. Komiti o Tulaga Mamalu ma Faailoga Tauloa-(1) O le a faavaeina se Komiti o le a taua o le Komiti o Tulaga Mamalu ma Faailoga Tauloa.

(2) O le Komiti o le a aofia ai ni sui se toaono (6) e faapea-

- (a) Failautusi a le Kapeneta, o ia lea o le a avea ma Taitaifono;
- (b) Failautusi a le Matagaluega o le Palemia;
- (c) Failautusi mo Mataupu tau le Lotoifale;
- (d) Toatolu ni tagata e tofia e le Ao o le Malo, i luga o le fautuaga a le Kapeneta, o le toatasi o i latou ia o le a avea ma sui -
 - (i) Vaega tumaoti;
 - (ii) Ekalesia ma faalapotopotoga faale-lotu;
 - (iii) Alii ma Tulafale o Samoa.

(3) O Sui ua tofia e tusa ai ma le faafuiauupu (2)(d) o le a tofia mo se vaitaimi e tolu (3) tausaga peitai e agavaa mo le toe tofiaina mo se isi vaitaimi po o ni vaitaimi.

(4) O le Komiti o le a fuafuaina ana lava tualumaga e tusa ai ma mataupu uma.

(5) O Sui o le Komiti e mafai ona totogiina i ai ni totogi ma ni alauni e pei ona o le a fuafuaina e le Kapeneta mai lea taimi i lea taimi.

24. Matafaioi a le Komiti – O matafaioi a le Komiti o Tulaga Mamalu ma Faailoga Taualoa e faapea -

- (a) Iloiloina o tagata mai i nofoaga uma o Samoa ma fafo o i latou ia e ono agavaa mo faailoga po o faailoga taualoa e le o aofia ai manaoga uma ua aiaia e lenei Tulafono (Honorary Awards) ma tuuina atu fautuaga i le Kapeneta mo le tuuina atu o faailoga i so o se tasi o ia tagata e pei ona ua ia manatu ua talafeagai i ai sea faailoga;
- (b) Faaauau pea ona iloiloina le agavaa o i latou ua uma ona tuuina atu i ai faailoga pe a talafeagai ai po o mo le faamoemoe ina ia fautuaina ai le Kapeneta mo le tuuina atu i ai o nisi faailoga tau Poloaiga maualuluga atu po o isi faailoga po o le a lava le tulaga o le a i ai.

25. Fautuaga mo le tuuina atu o faailoga – O fautuaga mo le tuuina atu o faailoga e tatau ona faia i luga o se tusitusiga e le Komiti ma tuuina atu i le Kapeneta.

26. Foliga o faailoga ma tau-(1) O faailoga taitasi o le a aofia ai -

- (a) Se tusi faamaonia e tuuina atu i lalo o le lima o le Ao o le Malo ma faamaufaailogaina i le faamaufaailoga a le Malo o Samoa;
 - (b) Se pine o lo o i ai po o le leai foi o se lipine e pei ona fuafuaina e le Komiti o Tulaga Mamalu ma Faailoga Taualoa; ma
 - (c) Se ata moni o le pine ua faaitiitia ma se lipine e pei ona o le a fuafuaina.
- (2) O pine, lipine, tusi faamaonia ma ata moni ua faaitiitia o ia pine ma lipine o le a tatau ona fausia e tusa ai ma se ata e pei ona o le a faamaonia e le Ao o le Malo i se Poloaiga e faia i luga o le fautuaga a le Kapeneta.
- (3) O le tau o le tusia o le ata, gaosia ma le faaeeina atu o faailoga ma tau uma e ono aliai mai faasino i ia mea (e aofia ai totogi ma alauni ua faia e tusa ai ma le fuaiupu 23 o lenei Tulafono) faatasi ai ma totogi tau tupe ua faia e tusa ai ma le

fuaiupu 27 o le a avea o ni tupe alu faale-tulafono ma o le a totogiina atu mai i Faaputugatupe a le Matagaluega o Tupe e aunoa ma nisi tupe faatatauina.

27. Totogi tau tupe – O tupe totogi ua taua o le a tuuina atu faatasi ma le faailoga i le taimi e tuuina atu ai -

(a) I se tagata o ia lea ua tuuina atu i ai le Koluse a Malietoa le vaegatupe e \$2,000.00;

(b) I se tagata o ia lea ua tuuina atu i ai le Koluse a Samoa le vaegatupe e \$2,000.00.

28. Faailoga Taualoa e le aofia ai manaoga uma ua aiaia (Honorary Awards)–(1) I le noatia ma le fai fuafua i le fuaiupu 5, a fai o le Ao o le Malo i le faia i luga o le fautuaga a le Kapeneta ua faamalieina e faapea o se tagata ua ono tatau ona ia mauaina se faailoga e tusa ai ma lenei Tulafono ma e faapea o lenei tagata e le o se tagatanuu o Samoa, e mafai i luga o se Poloaiiga ona faaeeina i ai se faailoga taualoa e le aofia ai manaoga uma ua aiaia (honorary award) i lenei tagata.

(2) O faailoga taualoa e le aofia ai manaoga uma ua aiaia (honorary award) e mafai ona faia mo faailoga uma i lalo o lenei Tulafono e ese mai ai na i lo le Poloaiiga Tutasi a Samoa, ma o le a leai ni tapulaa e tusa ai ma le aofai o faailoga taualoa e le aofia ai manaoga uma ua aiaia (honorary award) e faapea e mafai ona tuuina atu po o faaeeina atu i lalo o lenei fuaiupu.

29. Faailoga leiloa – A fai o Le e umia se faailoga ua leiloa lana pine, lipine, ata moni ua faaitiitia po o se tusi faamaonia, e mafai ona ia mauaina se ata o ia mea mai le Matagaluega o le Palemia i le totogiina o tau talafeagai mo ia mea, ma le tau o le a faatulagaina e le Failautusi o le Matagaluega o le Palemia.

30. Faaleaogaina o faailoga ona o amio le taupulea – E mafai e le Ao o le Malo, i luga o le fautuaga a le Kapeneta, ona faia se Poloaiiga e faaleaoga ai se faailoga ua faaeeina atu po o ua tuuina atu i lalo o lenei Tulafono i luga o le mafuaaga e

faapea o le tagata o lo o umia sea faailoga ua faia se gaoioiga po o ni gaoioiga matuia po o ni amio le taupulea ogaoga e faaitiitia ai le tulaga mamalu ma le aloaia o le faailoga.

31. Solitulafono – So o se tagata o ia lea o le a faaaogaina so o se Pine, lipine po o se ata moni ua faaitiitia o ia mea e le aia i ai po o le taumafai i se faiga taufaasese e faapea ai o ia lea o lo o umia sea faailoga taualoa, ua ia faia se solitulafono ma i luga o le faamaoniga faale-tulafono ua noatia i se faasalaga e le sili atu i le sefulu (10) iunite tau faasalaga po o i le nofosala i le falepupui mo se vaitaimi e le sili atu i le sefulu lua masina.

32. Tulafono Faatonutonu – E mafai e le Ao o le Malo i le faia i luga o le fautuaga a le Kapeneta, ona faia ni tulafono faatonutonu uma e pei ona o le a manatu ai o ia ua talafeagai po o e fesoasoani mo le tuuina atu atoatoa o le malosiaga i aiaiga o lenei Tulafono.

33. Mea ua soloia ma faasaoina-(1) O le Tulafono o Faailoga Taualoa mo Galuega Maoae ma le Tauleleia 1992/1993 ua soloia nei.

(2) I le aso e amata faamamaluina ai lenei Tulafono, so o se Poloaiiga, faailoga po o se tusi faamaonia (e aofia ai so o se faailoga taualoa e le aofia ai manaoga uma ua aiaia (honorary award)) ua faaeeina atu po o sa tuuina atu i lalo o le Tulafono o Faailoga Taualoa mo Galuega Maoae ma le Tauleleia 1992/1993 o le a faaauau pea ona faatumauiina o latou aoga, tulaga ma le aloaia i lalo o tulafono o Samoa.

(3) So o se Poloaiiga, tulaga mamalu po o se faailoga (e aofia ai so o se faailoga taualoa e le aofia ai manaoga uma ua aiaia (honorary award)) e ese mai ai na i lo faailoga e pei ona faasinomia i ai le faafuaiupu (2) e faapea e mafai ona faaeeina atu po o le tuuina atu e le Malo o Samoa o le a faaauau pea ona faatumauiina o latou aoga, tulaga ma le aloaia i lalo o tulafono o Samoa
